



栖香閣詞卷下

梁谿顧氏文婉著

滿江紅

廿年前爲人題小影偶復見之感而作此
繡榻花關記當日輕塗嫩灑曾有箇蛾眉蟬鬢
頭深拜捧硯焚香舒小影爲他題咏增慷慨猛回
頭早是廿年前真堪駭清揚句今猶在繁華夢
今難再破丹青留得文魔筆債光景盡隨流水去
江山原是桑田海筭百年三萬六千場休驚怪

水調歌頭

寄織月閣

三月初十日猶憶去年時濃香畫閣微雨花裏織
冰姿一種柔情俠骨真解箇中冷暖一笑素心期
消釋頻年恨還驚兩鬢絲多間阻難相會易相
離况兼愁病咫尺妝臺未可隨今已緣慳若是向
後不知何似聚散總難期牋短言不盡神與暮雲
馳

浪淘沙三首

萱草

折簡寄忘憂莫更多愁額黃初印雨初收一縷檀
心開笑靨別樣風流猶憶去年游畫閣香浮媽
紅媚紫一庭幽常展空函桐葉咏絕勝封侯

何必畏炎蒸林下風生梧桐葉葉露華零姑射仙
人原是雪當暑者偏清病起喜身輕如在瑤京水
晶簾捲曲闌憑好句飛來賡險韻筆硯陶情
悔不話連宵分取無聊如今魂夢也難招多謝罡
風吹不斷一縷愁苗瘧鬼信如潮怕是今朝斜
陽時節又來邀償盡紅鑪冰與雪不廢推敲

南鄉子四首

賦得瘦竹如幽人秋花如處女

輕雨灑松筠林下風清浣俗塵瘦影蕭疏誰得似
幽人翠袖天寒倚夕曛嬌女豔秋晨淺紫輕紅
未解顰娥媚莫嫌秋太淡清芬九畹芳蘭佩可紉

兀坐憶西家北窗開桂影斜無限愁悰聊說與
秋花嫵媚幽閒恰似他 暗自數年華盼得秋來
事事賒七夕再逢人又病星槎位置依然隔綵霞
不耐坐殘更常祝華胥夢莫醒卻怪曉風吹薄幙
窗櫺爲趁清光補未曾 機杼自縱橫腕怯難拈
絮一星自笑無能如絡緯聲聲咽盡寒霜兩翼輕
雁去恰鱗來何幸孤踪繫素懷半幅衍波緘錦字
忙開卻是明珠漾鏡臺 也擬與追陪聞道秋花
滿徑栽帶眼頻移惟悴盡身材病到秋深恐不該
滿庭芳

乙丑元旦立春

除夕迎春春朝歲旦百年難遇今年瑤枝瓊樹光
映滿堂前無奈風鬟雨鬢何心去翦勝爭妍思前
事雪堂分韻黛筆拂雲箋 圍鑪簾半捲裁冰煮
雪繡坐香眠正繁華時節月媚花娟多少悲歡冷
暖黃梁熟一笑茫然今惟有閒身尚在子孝與孫
賢庚辰新歲大雪經旬時在楚黃署中裁冰
弄雪分韻題箋四十餘年恍如夢中矣

南鄉子

來去影雙雙花雨萍泥特地忙最是將雛時候好
栖香宛轉閒關夜話長 忍使擲秋光換卻排空
雁幾行明歲再來人健否休忘記取城東第一梁
前調

粟粒不須賒萬斛千鍾敢自誇夜落金錢鋪滿地
豪華分付雙鬟莫掃他 衰柳晚歸鴉曲曲闌干
淡淡花爲怯西風深護好輕紗移過鑪香供着他
如夢令

梁汾弟說歸不果

說道殘冬歸矣何事經春還未鉛粉褪梅粧又報
杏花微雨留住留住幾疊遙山煙樹

前調二首

月照重門閒字心上不離愁字樓上晚風寒吹斷
雁行一字留住留住再整依然人字

嬾貼泥金勝字書過空中怪字疏畧愧平生不學

簪花格字機杼機杼織就回文錦字

南鄉子

何必問生涯消受簾前繞砌花應是天公費裁剪
秋紗碧綠芭蕉映着他 春事縱繁華花到秋深
韻轉加擎露海棠嬌欲語欹斜欲乞名師畫着他

滿江紅

城南看菊寄纖月閣

爲訪煙霞看不足疏林如畫迷離處斷雲孤鶩輕
帆遙掛冷淡西風甘撲面淒清霜菊原無話向晴
空長嘯寄登臨斜陽下 權領畧花盈把聊假日
消憂罷恐秋光老去難留瀟灑興廢總沈波影裏

古今難定青山價待攜將此景問佳人從頭寫

前調

茉莉

玉骨亭亭似不屑俗人爲伍堪憐處愁懷莫釋芳
心未吐數朵清芬羞對月一枝瘦影嬌凝露喜含
葩向晚暗生涼消煩暑擎翠袖依簾幕移素質
纖雲護想晚粧新浴玉人風度學淺愧無看雪咏
才高自有吟秋句倩瓊姿珍重伴栖香相賡和

南鄉子

閒自數黃花三徑雖荒韻不賒山色青青當戶見
堪誇娥媚依然恰似他碧水映明霞一簇芙蓉

傍淺沙鍼綫筆床移得近窗紗淡碧輕紅繡出他

前調

紀夢

昨夢到瑤京僊女飛瓊花下迎曲徑回廊香拂袖
閒行滿架琴書近畫屏綺閣剪銀燈彤管香奩
細與評獨有桂花天上句偏清一洗春愁秋怨情
滿庭芳

劉姑惠佛手茉莉賦謝

素羽輕翻淡然無暑稜稜當暑偏清梨雲門掩甘
自讓娉婷聞道葵榴爭豔應愁說抹麗佳名裁蕉
葉停毫倚石香韻賦難成散花人不遠拈花微

笑合掌雙擎似纖纖指示海筏迷津為問鴛鴦繡
出金鍼法度與誰會長相伴紗窗清影月上晚涼
生

武陵春

秋日見桃花

淒慘秋痕吹欲斷香冷藕花中塞北誰傳數點紅
春信到西風 曾向武陵深處見驚問舊時紅許
放漁郎一棹通桂子伴芙蓉

重疊金

吳夫人贈畫梅

粉痕猶印纖纖手幽姿想與人同瘦何處看花來

花如對我開 數枝佳欲絕相共隣香月好句寄
來看清芬滿畫闌

點絳脣

雪後紅梅

水潤雲孤南枝微露經年信瓊瑤初褪數點胭脂
暈 半捲湘簾清影疏香映看難盡壽陽宮粉付
與東風領

天仙子

十影三首

曉鏡當窗花照影燕子飛來醉簾影凭高一望渺
長空孤鴻影疏林影天外輕帆樓外影 自掬清

流憐瘦影遠黛遙山爭翠影平分一半與池塘梧
桐影芭蕉影倒掛垂楊新月影

梅花界斷闌干影斜陽移過殘機影牽蘿補屋障
輕寒寒枝影琅玕影鷺飛不定栖鴉影 推不出
月穿窗影遮不住風搖燈影薄游人世耐淒涼貧
無影愁無影繁華夢去難留影

孤村流水丹楓影沙汀淺水歸鴻影百城南面等
身書牙籤影縹緗影揮毫點染湖山影 拂不去
霜飛鬢影剪不斷香絲篆影一簾春雨燕來時雙
飛影爭泥影栖香靜鎖梨花影

浣谿紗

不道韶光二月中深深庭院護春慵未消殘雪月
朦朧 二十四番花有信最淒涼是杏花風霏煙
霏霧滿簾櫳

前調

春事消磨雨雪中卻寒衫子未曾縫春分寒食太
匆匆 鳳頸燈搖珠箔捲玉簫聲遠畫樓空落花
還是舊東風

前調

卻愛流鶯喚曉眠一簾新月澆窗前杏花開也記
當年 怨綠愁紅銷慧業青谿白石浣衣天南唐
佳句寫裙邊

蝶戀花

寄織月閣

瀟灑疏籬閒點綴淡紫輕紅何必隋宮綠黃蝶自
來花自媚惜花情緒誰能會雨過苔青蛩語碎
新月旋生怎撇清光睡雁字砧聲風拂桂伊人也
與寒窗對

百字令

雲昏雨暗問天公那得許多愁緒應是瑣窗無限
淚化作千絲萬縷病骨雖存柔腸難續身世真無
味先離煩惱被人又早占去猶記藥碗茶煙去
年今日相對傷羈旅回首粧臺秋色裏憶着故園

花媚白髮衰翁紅顏少婦一別十年矣問古今來
更誰遭際如此

滿庭芳

弱絮輕塵空花幻影分明身世虛舟笑孤雲野鶴
何事淹留迴憶從前似夢無端別業海市蜃樓如
今似槿花臨暮燕子清秋休休韶華去也便瓊
花難奈風散雲流多少朱顏綠鬢空耽誤粉怨脂
愁何須問唐宮漢苑總屬沈浮

鳳凰臺上憶吹簫

寄織月閣

土木形骸風鬟霧鬢心情不似當年便時移事去

總付茫然最憶蘭閨道韞承相念着意相憐鱗鴻
便纖纖粉印頻寄瑤箋 嬋娟遙知此際正簾下
拈花卻伴花眠對湘紋茗椀露滴珠研應是南華
倦讀屏山側低按冰絃鑪煙細一絲輕裊吹上珠
鈿

賀新涼

中秋見有以月為韻者漫賦

長嘯問明月譜江山誰堪賦就美人花月除是沈
香人醉後曾記愁心與月吟不了曉風殘月今夜
瓊樓懸玉鏡有金尊檀板酬佳月香盈斗煙籠月
殘霞斷續關山月霧迷漫角聲鴻影寒沙捲月

幾處瑣窗眉黛斂幾處流黃待月更幾處纖纖掬
月莫道無雲清萬里看悲歡離合千家月吾長嘯
問明月

鳳凰臺上憶吹簫

初七日雨

鳳頸無光湘絃微潤依然釀就重陽問籬邊黃菊
已試輕霜昨夜生憎明月今宵又聽雨淒涼寒生
也催人刀尺倦理流黃 堪傷聲聲點點頻斷送
愁中病裏時光看芙蓉開徧幾日紅香莫去登山
臨水料俱是落木枯楊添悽愴漁歌唱罷鴻雁離
行

沁園春

甥姪輩讀書予家喜賦一章勉孫

蘭長新芽梅粧試粉柳眼回青趁輕寒淺暖趨庭
問字圖書半壁雪案琴橫硯雨飛來嬌鶯初轉似
送春光到畫屏逢良友有西園無忌茂苑長卿
文窗細雨閒評羨蘭畹金荃次第賡更斜簪側帽
裙書白練香留隔座談笑風生下里深慚未諳格
調漫說詞宗宅相名須欣慕揣摩自勵莫負年英

臨江僊

瓶花

清露細研粧粉翠綃斜映輕紅春光留駐小屏東

高低非困雨疏密豈欹風 換水移枝珍重湘簾
淡月朦朧誰言花事已成空茶蘼香夢裏素影畫
圖中

滿庭芳

四姑話舊

白雪閒庭三餘小閣昔年曾貯嬋娟分花鬥草何
地不堪憐剪燭西窗話舊相倚處攜手凭肩從別
後時移世換腸斷各風煙 想吳山楚水竹樓黃
署風景依然只霜鬢雪鬢不似從前何事驚心歲
月彈指便四十餘年身雖在槿花臨暮燕子晚秋
天

前調

壽王妹六十

林下清神閨中秀質蛾眉領袖天然雲鬢宮樣不
減似當年正是花中姚魏薰葭倚玉種藍田真堪
羨三株瓊樹文采總翩翩 百年從此始于飛舉
案共慶華筵看武陵春暖燕子樓前最喜芝蘭爭
茂簫聲裏翠鳳嬋娟真堪羨文宗理學雙壽地行
僊

憶秦娥二首

雞肋雖存懶從人熱索居寂寂惟王妹時
令青衣顧問兼承佳餉

殘冬逼迴腸百結愁難說愁難說有誰來問凍雲
寒雪 驚心歲月空相惜關心姊妹猶相憶猶相
憶笙歌影裏簸錢時節
憐淒切芳茗甜香時不絕時不絕殷勤魚雁粧臺
咫尺 深愁夢與秦娥說梅花影裏憑肩立憑肩
立閨房林下清神秀色

浣谿紗二首

張妹惠鞋賦謝兼呈王妹一晒

宮樣盤雲繡鳳頭一帆風順載春愁可能相與五
湖游 準擬朝來樓上望美人粧閣隔重樓暮雲
春樹見無由

養護春寒怕捲簾吟箋繡帖不曾拈玉人可也思
懨懨折去梅花鸞羽便寄來蓮瓣鳳頭尖粉痕
猶印指纖纖

前調

藍菊

知在東籬第幾重佳名偏喜與蘭同愛他開紫不
開紅為折一枝珍護好淺顰輕笑伴芙蓉肯教
淪落怨西風

前調

秋紅

百葉重臺照眼明水晶簾下伴孤吟停車何必坐

楓林不似槿花愁日暮儘留顏色待秋深清霜
濃露沁檀心

一剪梅

春寒

重鑪香燼漏迢迢不似春宵還似寒宵薄煙深院
杏花梢難道明朝便是花朝淒風凍雪雨瀟瀟
鏡裏容銷夢裏魂銷隣娃莫去踏春郊吹斷秋腰
瘦減裙腰

採桑子二首

咏秋海棠

愁來只有秋花好金粟新黃翠葉秋棠紫粉鬢花

媚夕陽 花時盡日垂簾坐本是淒涼花落還傷
花落人愁哭一場
絲絲細雨盈盈淚澹澹籠煙裊裊風前低影愁紅
似可憐 偏宜翠竹青花小清露珠圓別種幽妍
不受塵埃半滴泉

前調

正咏秋海棠表妹張夫人適以此花見贈
更成一詞

胭脂點破冰壺露疏雨濃煙石榻湘絃曾伴飛瓊
膩雪箋 檀痕粉印驚分贈素手親拈喚起愁眠
今夜幽窗對影憐

沁園春

題美人箋

佩紉幽蘭歌拈紅豆並倚娉婷儘愁人揮灑登臨
觴詠催歸送遠邊怨閨情攜向碧窗粧鏡側輕喚
起盈盈翠袖擎瑤臺上飛瓊萼綠爭似卿卿 研
光清凝賦粉待細研石黛染就丹青譜霜濃月暈
寒鴉落木孤篷夜雨長笛離亭一抹蒼煙鴻影看
幾點環螺接楚城標題處把霜毫空閣半摺雲屏
摸魚兒

惜年華那看短日如許冷清清地長愁病禁得幾
宵疏雨當年事空憶着雕闌玉砌東風裏斜陽歸

去算只有多情伴人瘦影相對各無語 思伴侶
鬥草西鄰女別來也應憔悴青衫翠袖知何處脈
脈盡隨流水君聽取君不見紛紛今古皆如此誰
非誰是何必問青天本來造化萬物總難據

重疊金

重裊錦幄原無福琴書半榻和愁宿催雪上雲鬢
能消幾夜寒 餘生知己矣彈指韶光去有酒可
忘憂何難飲百甌

鵲橋儂

湘簾未捲沈煙濃注乍展芙蓉玉鏡小箋雲粉滿
粧臺又製就鬢花新詠 嫩涼初透停杯問月碧

海青天難趁分明一幅綺窗圖誰解得此時佳景

南鄉子

疏雨滴重檐鏡裏霜花昨夜添一片冷雲扶不起
慊慊拈住濃香莫捲簾 半晌嫩寒巖帶減茱萸
一束織刀尺催人雙腕弱摻摻愁緒如絲嬾去拈
重疊金

秋牡丹

誰云春豔秋搖落春風到處傷飄泊吾意愛秋花
經霜韻轉加 標題天上桂管領東籬媚簇簇擁
花王齊齊淡淡粧

剪湘雲

剪秋紗

霧縠初成湘雲乍剪早驚破秋窗砧杵聲怨錦字
機絲慵去理羅綺不勝弱腕製輕衫珍重餉天涯
擘藕絲爲綫還倩斷雁零鴻蘆花谿畔怕日炙
霜侵風驟雨濺無語低鬟垂佇處脈脈似聞長歎
結茱萸雙帶佩秋蘭浥愁人淚點

滿江紅

墮馬啼粧學不就閨中模樣疏慵慣嚼花吹葉粉
拋脂漾多病不堪操井臼無才敢去嫌天壤看絲
絲雙鬢幾時青空勞攘應不作繁華想收拾起
淒涼况向牙籤境內自尋幽賞昨夜樓頭新夢好

輕風吹送瑤臺上散閒愁高枕是良方飛瓊餉

百字令

元宵前三日覓得梅花水仙草蘭三種清
芬滿閣恍入羅浮香夢故賦此詞

東風一笑又經年耐盡凍雲寒雪秀骨未容輕位
置要占羣芳第一古驛書遲深宮夢醒香冷瑤階
月孤眠紙帳醉淺愁深時節那更玉笛驚吹瓊
樓賦罷獨自臨風立桂葉雙蛾慵未展何待珍珠
慰寂九畹芳蘭陵波仙種瑞可成三絕栖香閣靜
伴人冷淡踪跡

金縷曲

踏歌簫鼓火樹星樓金吾不禁士女成行
諺云誰家對月能閒坐何處聞燈不看來
予獨不出因賦此詞

對月能閒坐似空山更寒人靜雲深煙鎖道甚新
春愁緒減依舊寂寥無奈誰領畧滿城燈火看徧
小屏風上畫只梅花清瘦還如我邀素月成三箇
韶光一瞬隨風墮鎮消停幽蘭香裏羅浮夢左
睡鴨頻移瓶注水便是長宵工課垂紙帳擁衾高
臥鳳頸微沈門靜掩又何心問踏歌簫鼓蓮花漏
從頭數

浪淘沙二首

青衣從波浪中得梅花一枝花淚盈把諒
不肯終隨逝水者因留作蓮臺清供賦此

誌感

曾向雪中開沒點塵埃肯隨桃李逐波來爲有湘
靈深遣護擲去重回無力傍瑤釵淚粉盈腮生
香真色莫疑猜好伴楊枝甘露水供養蓮臺

綠萼試清泉香粉增妍休言海筏渡無船春色原
如秋水冷未許人憐若過散花天風韻依然一
枝彌勒現尊前不羨人間雙梵蒂願化青蓮

昭君怨

元宵理髮折去一梳意非佳兆作此自解

直妄言之非妄想也

恰恰弓弓如月常伴粧臺梳櫛鏡裏一絲絲是伊
知償足賣釵風韻減却纖纖一寸從此嬾雲鬢
換金冠

浪淘沙

和纖月倒用原韻

何必羨儒冠花滿闌干掃眉才子是鳴鸞得近班
家明月句願作齊紈痛飲不須酸簾外輕寒海
棠枝上露團團驚醒今宵香夢影刻向琅玕

滿江紅三首

贈薛夫人

蘭畹金荃問佳句有誰消得除非是沈香亭畔一
枝傾國數載端詳雲鬢影如今始傍牙籤側想曾
隨阿母禮真僊瑤臺月渾不是初相識寒暄語
何須說願小年如畫清談竟日無奈妒花窗外雨
催春去也催人別笑歸來魂夢尚依依重尋覓
萬斛愁思誰織就漫天風雨難禁架將歸送別遣
懷無計望去畫樓煙樹遠飛來險韻驚人句算詞
壇端合讓裙釵低頭矣人宛在香窩裏飛絮詠
休輕棄似蘭吹風送名花解語莫把韶華和恨鎖
空花幻影尤難寄看他年麗句滿香奩傳千里
夢裏香窩常只在繡窗朱戶最相宜微風纖月淡

煙輕度遲暮難酬香豔句病魔隔斷鈿車路羨耽
書深癖似伊稀還餘我 殘暑退輕雷過虹影沒
斜陽暮愛梧桐幾葉鬢花數朵縹緲漫憐銀漢影
參差誰是穿針侶只無聊燕子故飛飛來青瑣

步步嬌

卻又早綠葉成陰深深院徧小窗紗流鶯轉問可
是城東第一妍詞章禁苑傳謫僊才人爭羨

殿前歡

博得箇柳枝憐抵少簪花書格沅花箋看梳雲
一字尤堪羨

新水令

半窗晴日杏花天殢東風柳絲嬌軟分題拈翡翠
折簡寄嬋娟綠映平川踏青時燕來庭院

駐馬聽

宿雨朝煙露浥胭脂紅數點閒庭寂寞惜花人起
夢尤淹傍粧臺幾度嬾臨鸞整凌波款步青苔蘚
笑嫣然看朝陽一朵春光綻

桃絲自製曲

壬子九月二十一夜夢兩僊子煙鬟雲鬢
霧縠霞綃芬芳襲人珊珊而來光彩耀室
遺予草二株一枝條碧紅絲非花非葉纖
纖可愛不與垂柳似云是桃絲一枝翠葉

木香隱言卷下
淺深如梧如菊如桂如蕖方圓斜整種種
可異云是翠凌波因其名遂各製一詞記
之

清波難寫流虹影喜夢裏垂垂比似人間枝葉異
桃絲紅房爛煮瓊花宴問此會何時四十九年
償慧業歸遲

翠凌波 自製曲

香透衾鸞鬢欹釵鳳斷鼓零鐘薄醉和愁擁哀雁
啼蛩清露重翠生生幻出凌波夢靈根知是瑤
臺種豔葉柔絲不與凡花共待展研粉吳綾寫幅
屏山清供珠箔深沈不教風雨吹送

附錄

滿江紅三首

薛夫人

和栖霞見贈

敢曰金蘭只弟子繡裙難得休說起撒鹽飛絮傾
城傾國遣婢賣珠金谷裏牽蘿補屋青山側問幽
栖何事可消愁花和月樂莫樂新相識平生事
從頭說有香窩似斗兼饒風日且作平原十日飲
今生慎勿輕言別恐良緣易散彩雲流難尋覓
鎮日焚香消不盡撲簾煙雨青苔院餘花委地欲
留無計自入春來詩思減欲吟紈扇無佳句悵年
華似水向東流誠已矣 琉璃硯凝塵裏翡翠筆

成拋棄有幽懷如許那堪無語咫尺暮雲花外路
不教青鳥緘愁寄怨芙蓉秋水隔伊人成千里
偶作軒窗恰山色青青入戶朱闌外翠嵐輕染白
雲低度鶯寂燕喧梅雨候沙明水秀谿頭路看藤
蕪綠到板橋西誰過我 修竹畔清風過垂楊外
寒煙暮對長紅小白滿庭花朵讀罷南華情轉切
無端忽念金釵侶折花枝歸去伴花眠秋心瑣瑣

浪淘沙

奉贈侯太夫人

曲徑繞琅玕秋露溥溥晚來東閣恰生寒蟬鬢書
生居上座也是寒酸 佳句滿齊紈繡鳳雕鸞文

情筆態滿闌干不用囊螢兼映雪勝卻儒冠

前調

用栖霞原韻

劉夫人

慵整舊時冠小倚闌干夢回驚喜接青鸞展卷蘭
閨酬和句勝卻齊紈 快意不知酸風送輕寒愛
花微怯露溥溥對月幾番吟不就畫損琅玕

右栖香閣詞二卷吾邑顧安人文婉著案邑志安
人爲梁汾舍人姊同邑考授州佐侯晉室曾王舅
先春官給諫著直聲明萬歷間王舅世美縣文學
祖姑王太宜人苦節能詩嘗與黃石齋先生室蔡
夫人倡和舅鼎鉉戶部主事子麟勲 國朝康熙
己未進士官吏部主事安人生長名門少嫻文史
晚享大年益以詩詞自遣詩百七首其族孫響泉
先生已刻梁谿詩鈔中獨詞僅鈔本余家與侯氏
世姻嘗得讀而愛之癸未夏客江西學使李芝齡
侍郎所偶誦所記憶一二闕侍郎亟歎賞因屬於
鄉書中郵致之校付剞劂夫臭味之感靡間冠笄

故或啟青綾而抗義或啟絳紗而請業至於百年
之久千里之外聞竒輒蒐無幽不闡侍郎之嗜才
若渴益可類推此百餘年中操觚之士泯泯何限
乃安人之作久而彌章其故又有可深長思者故
侍郎女弟既為之序余復繫其淵源於簡末時道
光五年八月無錫孫燮謹跋

滿江紅

寄孫和叔兼呈山陽李侍郎芝齡
先生

煮茗焚香怎消受滿窓風雨正鈔就棲香
舊稿欲緘無計遡到詞壇人世遠挑燈讀
罷清新句問篋中藏得幾時光百年矣
臺閣老韓歐侶真賞識焉能棄仰龍門儒
宿相知告語緇帙他年東里重縹囊此日
西江寄盼流芳翰墨達鴻都傳千里

高祖母顧太安人端文公孫庸菴公女梁
汾公胞姊家學淵源涵濡風雅著有栖香
閣詩表舛顧觀察響泉選刻梁谿詩鈔栖
香閣詞未經刊刻歲癸未山陽李芝齡先
生督學江右親好孫君和舛在幕譚及錫
邑詩人並閨閣工詞章者偶誦安人詞先
生擊節嘆賞曰君胡不於家書中郵致之
疎得書即命元照繕鈔詞稿寄呈先生遂
將詞藁校付梨棗乙酉冬和舛旋里携板
歸焉竊思安人之作經二百年之久幸得

大人先生刊行傳世使閭閻清辭永垂不
朽文章知遇可不謂盛歟是非先生之嗜
才孫君之讚道烏能至此哉矧寸心銜感
實越尋常謹跋道光六年丙戌三月之望

忠孝堂藏板



